

1 Timotius

Paulus arye peterebuk ura, diba tenebuknye, Timotius ati, minopce sekeiyamuk yupu

Paulus arye asurat sekuk. Efesus mutuku peterelbiyuk talak, minyuma ara, Timotius ap birika ati, (Rasul 19:22), Paulus arye, ‘Timotius ara, Efesus diba tenebik ninye melibuka peterenamle’ tenen, Timotius dobuka, Efesus mutuku dobuka bina deibukba, elda biyuk (1 Timotius 1:3). Paulus arye, Timotius ati, ‘Winipnulyame ayupu peterenamlyame,’ nyapnyop ura, ‘Elcuk peterenamle’ tenen, asurat sekuka, Timotius dam dopreibuk.

Timotius ara, fia teleb fil donanye ulamuk. Paulus arye Listra mutuku peterebuk talak ara, Timotius kekebukce, diba tenebuka ati, Paulus arye Timotius ati, “Na mi kopropa atonun ulyame,” nyalamuk (1:2). Timotius ap, Paulus ap, sik neika peterepra balamrik mutuku ara, Makedonia mutuku tam nirya ap, Akaya tam ap (Rasul 17:14-15; 18:5), tonda Efesus mutuku ap, Korintus mutuku ap, peterepra balamrik. Tonda, Paulus arye diba tenena ninye ati, surat weik sekuka dolilamuk talak ara, Timotius ap melibuka seklamuk. Asurat si ara: Korintus, Filipi, Kolose 1-2 Tesalonika, Pilemon.

Abuku noutamak ara, Paulus arye mambul yupu sekeipsuk ning ara ani. “Tilila yupu peteren nang arye nyanyak yupu ara, yupu seklyame,” nyabuk (1:3-7, 4:1-8). “Efesus mutuku diba tenen nang arye, Allah el si erepdeipnamak talak unamak ning ap, sik neika unamak talak, wininamak ning ati, melibuka peterepnamlye,” nyabuka, Timotius ati nyabuk (2:1-15). Tonda, “Efesus mutuku diba tenen nang, sik deiyok nang wibuka deipnamlyame,” nyabuk (3:1-13; 5:17-25).

Paulus arye, ‘Telebe’ nyana ati, nyabuk yupu

1 ¹Telebe, na Paulus arye, an Timotius ati, abuku sekeibkine. Anda, Yesus diba akunum teneplum ura, kanye

dukdongopsuk ati ara, na mi koprop atonun ulyame. Nun Lyena Deiyoknye^a Allah ap, ‘Yesus Kristus dipkoprop dolyanamsil’ tenen, kanye deibuka dina uk unyapnye Yesus ap, sik bitinye, “Wininamyame,” nyapdeipnirik deice arye, fil donune. Na fil ara, Yesus Kristus el yupu dobuka, peterelbana ati, wipdeipnirikba, Rasulnye unune.

²Ara, na mi Timotiuso, nun Ni Allah ap, nun Deiyoknye Yesus Kristus ap, sik bitinye bico tenesururak akarye, sik kanye tenebuka talye melisirikce ning ap, ura nun malye una ati, wenebuka talye opsutu bukni, aning namin kipsirikiryne, nun patapsilye ning talya aryuk arisirikce ning ap, tonda, ‘Yuk nang ap yu ulana kumce, kanye deibuka, telebuk neika unamle’ tenen, arikurak deiyok ning ap, arikururake. ‘Aning nirya ara, tuba-tuba weik arye tabakuka arinamkirak’ tenen, an Timotius ati, Allah morokunune.

Tilila yupu peteren nang ati nyabuk yupu

³Ara, na Makedonia mutuku binamse talak nyapdeiamkise touk, anda Efesus mutuku tuba unalyame. Ara, dipkoprop Allah el yupu ulye touk kum bukni, yuk tilila yupu peterenyak nang ati, ‘Ance sik yupu sekenalyam’ tenen, nyapkise. ⁴Tonda, anang arye, talye-talye nukunyak yupu, minop talak nuklamik yupu atonun nuklamik yupu ap, nong kum upnamle yupu ap, sik apu yapu nang arye dadeipdanin, yangalamik akarye nyalamik yupu ap, moubuka talinyak akarye, ayupu uk kekenyake. Anang arye kekenyak yupu ara, talye yupu anya arye, ‘Adip aryuk bataknamak’ tenen, yupu sekenalyame nyapkine. Amalye yupu fia tenebuka talinyakop ura, ninye kanye wililakiryne, yupu deice arye walakiryne, yuk-yuk kilonyake. Allah el mapu nirya ati, bico tenebuka melina ap, teleb ubuka peterena ap ara, Allah diba tenen deice aryuk wininyaba anya arye, tilila yupu deice arye kum wininyabe. Ara, kum winipmanto, ati, atalye yupu nirya ara, ance yupu sekenalyame.

⁵“Winiplyame,” nyapmakin yupu deiyok ara, yuk ton kume. ‘Ara, nunce yuk ninye ati, bico tenebuka melinamap’ tenen, nyapmakin ning uka. Yuk nang ati, bico uplyop ura, melildana deiyok ara, ani. Ninye kanye talima mingne atonun una ap, nun kanye tenen ning noutamak, malye ning duknuna kum, diksukumuk una ap, tenepce arye talye nyana kum bukni, fia dib tenena ap, aning nirya wininyaba deice arye, yuk ninye ati kanye arisulule.

^a 1:1 *Lyena Deiyoknye* Alkitab noutamak ara, Lyena Deiyoknye sekenyaka ara, ton talak Allah tenen ati sekenyake. Ton talak ara, Yesus tenen ati sekenyake bukni, deiyok ara, Yesus el ining arye kilipsuka deice arye Allah arye lyesulule. Paulus arye Allah tenena ati ayupu sekuk. Laka nyana yupu nomor 17 dipdelelume.

⁶Ton ninye ara, awinilye nyapmakin ning batakuka, urasin yuk kwalin bisik banyakce, nong kum upnamle yupu, fia talye-talye yupu uk kekebuka unyake. ⁷Anang ara, utenenyake. ‘Kume, Allah arye, “Wininamlulume, aning ton kum wininamlulume,” nyapdeibuk ura, Musa sekeiyamsuk yupu^b ara, nunce peterena deiyok nang atonun unamabe’ tenen, wininyak bukni, dipkoprop ara, sikce, ‘Dipkoprop deiyok ani, ani’ tenen, mikip arye peterenyaka deiyok yupu ap, talye sisiklamak yupu ap ara, sik babye, ton fia walwale. ‘Deiyok ani’ tenen, moubuka kum tenenyake.

⁸Ara, nun kele. Allah arye, “Wininamlulume, aning ton kum wininamlulume,” nyapdeibuk ura, Musa arye sekeiyamsuk mem yupu ara, dipkoprop teleb yupu uk ulula anya arye, yatanye do nirya, ayupu dobuka, dipkoprop fia diksukumuk ubuka petereplyop ura, telebuk ubuka, ninye melisulule. ⁹Tonda, nun kele. Allah arye nyapdeibuk ura, Musa arye sekeiyamsuk mem yupu ara, Allah arye diksukum un ninye ati kum nyabuk. Kume. Ayupu ara, Allah ap, ninye deiyok nang ap, sik amutam una kum arye, sik nyanyak yupu ati, yaninyak nang, sik wenena ati sekeipsuke.

Tonda, ‘Allah el mambul,’ tenena fia kum arye, kanye fia malye-malye wininyak nang ap, tonda, ‘Allah nyasilye yupu ap, el ulul ning ap, talye ning uka,’ tenebikirye, Allah el fia teleb ulul ning, el mingne ning nirya ati, akutubuka nalinyak nang ap, tonda, sik ni yapu koprop ap, sik nin yapu koprop ap, yuk talye nang ap, oltakanyak ninye ap, ati, Allah arye amem yupu nyabuk ura, Musa arye sekeipsuke.

¹⁰Aning atonun, sik domice kilapu batakuka, yuk kilapu talye yon nang ap, tonda, sal mamun arye sal mamun uk yolani ninye ap, kilapu arye kilapu mamun yoldalamak kilapu ap, tonda, ‘Anang tapu koubibirye, yuk nang dam dekuka, yo bok weik doproptibye’ tenen, winin nang ap, tilila yupu talye nyaltakanyak nang ap, Allah arye amem yupu nyapdeiyamsuke. Tonda, yupu bokolin talak, “Dip nyapmabe,” nyabuka, talye nyaltakanyak bukni, tilila yupu tenepce arye nyanyak nang ap, ura yata malye winin ning do nirya, amalye un ninye arye, Allah el dipkoprop yupu nirya nyasilye touk yanibuka, fia malye un ning, yuk-yuk ning nirya wininyak nang ap ati, yupu wenena ati, Allah arye amem yupu nyapdeiyamsuke.

¹¹Allah el dipkoprop lak teleb yupu ap, el nong ap, nirya fia telebuk ulule. Allah arye, ‘Ninye lyena ati, na lak teleb yupu dobuka, Rasulnye ulirye peterelbanamle’ tenen, wipdeipnuka. Na Paulus arye nyabuka sekeibkine.

Allah el kanye arye Paulus ati melyamuk yupu

¹²Nun Deiyoknye Yesus Kristus arye na ti, ‘Na fil melinanye ulirye, batakna kum arye, fia sirya dakedongobuka, na fil donamnile,’ tenepnukak arye, wibuka

^b 1:7 *Musa sekeiyamsuk yupu* lak len yupu ara, nomor 35 dipdelulume.

deipnuk. Uteneamnuk ati, wipdeipnuk akarye, el mikip aryamnuk ati ara, el ti, “Naie, anda fia telebe,” nyanune. ¹³Minop talak na ara, ‘Yesus Kristus elda talinye’ tenen, el ti malye yupu nyalamsirye, el dib tenelamik ninye ati, fia yu ubuka, sik nong deice weik ikin ning deililamsirye olamse. Winibuka ulamse bukni, amalye ulamse ning nirya ara, dib tenena kum, fia walwal deice arye ulamse ati, Allah arye na ti, talye merekukua opnutu bukni, amalye ulamse ning talya namin kipnukce, luba kibuka, bico teneamnukce melilamnukce.

¹⁴Nun Deiyoknye Yesus arye, el kanye aryuk na ti, bico teneamnukce, fia weik arye melilamnukce. Mitikanun arye kume, el ti dib tenena deiyok ning ap, yuk ninye ati, bico tenena deiyok ning ap, abitinye weik arye aryamnukce. Yesus Kristus ap, kanye dukdongobuka ulamap talak noutamak arye, abitinye ning arisulule.

¹⁵Anyapnukin yupu ara, fia dipkoprop yupu anye arye, ninye mutuku-mutuku nirya, adip aryuk ayupu dib tenepninge. Ayupu ara, ani. Yesus Kristus tukwak mutuku yayuka deiyok ara, yuk kume, malye un nang lyena ati yayuke. Malye un ninye weik aunyak bukni, fia weik malinye bira na ulamse, nyapkine. ¹⁶Weik malye ulamse bukni, Yesus Kristus arye na ti, ‘Aweik malinye talye merekukua optinye bukni, luba kipnilirye, kanye aripnibuk, melibuka lyepnyop ura, yuk nang eibikirye, Kristus ara, bico tenesululnye, dib tenepninge’ tenen, lyepnukce. Kristus arye, malye winin ninye ati, bico tenesilirye, ‘Se aminyan diba tenepninge’ tenen, minop wena kum arye, namin kisilirye kum batakasulule. Ati, aning atonun winipnuka deice arye, yuk nang ton eibikirye, ‘E Yesus dipkoprop namin kisulule’ tenen, kel binamake. Kel bikmakcop ura, Yesus ati, dib tenebikibuk, bol koplobuka fia kam una deiyok ning doproprnamake. Yesus arye, ‘Paulus ati winipse ning, yuk ninye ton eibikirye, kel biknamak’ tenen, na ara winipmantonye ati, winipdeibnukce.

¹⁷Aning ati ara, nun Ni Allah, elda Weik Ninye Deiyoknye, Sisinanye^c minop dorapce dipdongobuka noutam talak ap, winitalak ap, aminyan do unamle talak ap nirya, fia unamle. Elda, fia kam ulul anye arye, kum diptue. Ninye asing arye fia kum eiptingce. Dipkoprop Allah ara, el tonoka, yuk ton kum ulule. Ati ara, ninye nirya arye, adip aryuk atalak babye, aminyan talak nirya babye, ‘El ti si erebuka, el si weik arye erepnamak’ tenen, Allah moronune. ‘Aning ara, dipkoprop unamle’ tenen, fia patanulul anye arye, Amin nyapne. Akunuma.

¹⁸Na mi Timotiuso, minop talak, Allah yupu laka nyana deiyok nang, nabi^d nang arye, aminyan winipnamuk ning tenebuka, an ti laka

^c 1:17 *Sisinanye* tonda Indonesia yupu deice arye Raja nyanyake. ^d 1:18 *Nabi, Allah el yupu laka nyan nang* – Allah el yupu laka nyan nang ara, Allah arye, ‘Ninye kekeprnamak’ tenen, elce wibuka deiyamuk nang ati, el yupu laka nyabukop ura, anang arye, yuk ninye nirya ati, laka nyalbalamik. Anang ara, nabi nang nyanyabe. Nabi nang sik laka nyan yupu nomor 25 dipdelulume.

nyalamik yupu atonun, na babye winitalak kanye arye tonap, ayupu uk akunum nyapmakine. “Winipnamlyam,” nyapmakin yupu deiyok ara, talye ati kume. Ara, yin talin nang arye, malye un ninye ati, fia piribuka mikip arye olbalamak atonun, anyapmakin yupu kekebuka, moubuka talipminya deice arye, Allah el fil teleb ubuka donamlama ati, nyapkin.

¹⁹Atalak-atalak niryana noutamak arye, kanye bokoltona kum arye, Allah ati fia dib tenebuka unamlyame. Tonda, an kanye tenen ning noutamak, malye winin ning duknuna kum arye, diksukumuk unamlyame. “Winipnamlyame,” nyapdeipmakin ning bitinye ara, yuk nang ara, aning bitinye batakika deice arye, Allah ati tuba dib kum tenenyake. Akunum batakikke, fia kanye imun unyake. Anang ara, laut mekwen deice balamle mek liyo, banmalya ani, mankau arye mekwen fumbisik wamlye keil diplibuk, mekwen fumbisik weklirye, dilamle touk, winibikirye, sik winin ning niryana malye wininyake.

²⁰Amalye wininyak nang atonun, urikke nang bitinye, sik si ara, Aleksander ap, Himeneus ap, winirudake. ‘Isa Mutuku Dongonye birye anang ati, malye kilibuk, weik kanye imun kanye bonamrak’ tenen, na arye anang ara, Isa Mutuku Dongonye biti akunum aripse. ‘Allah elda talinye’ tenen, ‘Yesus ati malye yupu nyana ara, fia malye winin ning ulule,’ tenebuka, ‘Kel biknamdak’ tenen, na arye anang ara, Isa Mutuku Dongonye ati akunum aripse. Na Paulus arye sekeibkin.

Allah morona ap, el si erena ap, ati nyabuk yupu

2 ¹Ura, Timotiuso, anggun niryana adip aryuk wininamlulum ning mikip arye nyapnukine. Weik mambul ning ara, ani. Ara, anggun dib tenen nang arye, yuk yala nang niryana ati, Allah moronamlulume. Ninye patan ning ap, ikin usilye ning ap ati, ‘Allah arye yuk ninye melinamle’ tenen, moronamlume. Tonda, yuk nang niryana ati, “Telebe,” nyabuka, Allah moronamlulume. ²Mambul ning ara, weik ninye deiyok nang, Sisin nang ap, ninye deice tam unyak nang yala-yala niryana ap ati, Allah moronamlulume. Ara, talye ati kume. Ara, nun niryana arye ninye deiyok nang ati, Allah morobibyop ura, anang Allah arye anang ati meliplye deice arye, teleb wininamsiyake.

Ara, ‘Talye kanye deibuka, nimalye arye teleb ubuka neiktoto una ap, Allah diksukum ulye touk, nun babye, diksukum una ap, kanye malye una kum aryuk, etekdop utibye’ tenen, Allah moronamlume. ³Winibuka una ati ara, Allah nun Lyena Deioknye kanye delisulule. Ara, teleb una atia.

⁴Nun ni Allah ara, ‘Ninye mutuku-mutuku niryana na ti dib tenepniting deice arye, lyepnyop ura, na dipkoprop yupu niryana kel kipnamak’ tenen, pataplubuk tenesulule.

⁵Allah ara, el tonok. Yuk ton kum ulule. Atouk, Allah danatam, ninye niryana danatam, noutamak ulirye, kanye dukdongobuka melisilya

deiyoknye bira, el tonok ulule. Yuk ton kume. Anye el si ara, Yesus Kristus arye nun ap, Allah neika kilisulule. ⁶Yesus elce, ‘Ninye mutuku-mutuku nirya sik malye unyak ning kum daneipnirye, dekuka lyepnamne’ tenen, elce el nong uk aripsukbuk obik. Ara, nun malye winin ning ati, talye oplopsutu bukni, Yesus arye nun pununa ati dipsuke. Allah arye, ‘Teleb talak ara, atalakuk,’ teneamuk touk winibuk. Allah arye, ‘Ninye nirya lyeptinye’ tenen, patalamuka ara, awinibuka deice arye akunum lak kipdeipsuke.

⁷Allah arye, ‘Ninye mutuku-mutuku nirya noutamak, kili sal weik arye lyeptinye’ tenen, patalula anya arye, ‘Paulus arye ninye lyena ati lak teleb yupu deiyok kounanye, Rasulnye kiplirye peterepra binamle’ tenen ati, wipdeipnuke. Tonda, ‘Yahudi yala kum ninye babye, Allah el dipkoprop yupu kekebuka, dib tenepnamak’ tenen, peterena deiyoknye kipdeipnuk ura, unune. Ayupu ara, tilila kum nyapne. Dipkoprop nyapsine.

⁸Ara, na kanye ara, ‘Ninye mutuku-mutuku nirya, adip aryuk malye kanye bona ap, yu una ap, yupu deice arye waldana ap, kum anirye, Allah ati kanye deibuka, fia diksukum ukirye, sik kurun taruk erebikirye, Allah moronamak’ tenen, Allah moronune. Na Paulus arye sekeibkine.

Kilapu sik unamaka ati nyabuk yupu

⁹Ara, na kanye ara, kilapu nirya adip aryuk, talye kanye bobuka una kum, kanye moubuka tenebikirye, ‘Ninye yuk nang eipsikirye, yobsiting,’ tenebuka, ‘Pitin-pitin unamsiak’ tenen, bumang butum aling ongona meme. Tonda, anggunda, yuk ninye arye nun ongon ning eipsikirye, ‘Se akilapu ara, urasin fia teleb anya arye, dobuka yoptibye, tenepnamsiyak’ tenen, potong kouna ap, emas teleb ning ap, dekna weik karakna ning ap ara, dekna weik butum aling ap, yuk kweirya ap, dona meme. Winina ara, fia malye ati nyapne.

¹⁰Aning kum bukni, Allah arye, ‘Na si erebuka, na ti kanye deibikirye, na melin kilapu ara, wininamake,’ tenesilye touk, ninye melina ati, teleb fil dona ap, ninye bico tenebuka melina ap, diksukumuk unamake. Yuk ninye, aunyak ning eibice, deice arye, ‘Akilapu ara, telebuk,’ tenepnamake. Kwerya weik ning donyak deice arye kume. Allah si erebikirye, diksukumuk unyak kilapu ara, amalye winin ning kum wininyake.

¹¹Kilapu nirya ara, sik adip aryuk peteren talak kel bikna ati, sal amutamuk ukirye, namin kanye arye lamabuka, sal yupu moubuka kekepnamake. Sal arye peterenamak talak ara, kilapu arye yupu kum nyanamake. ¹²Na kanye ara, kilapu nirya, arye sal amutam kibikirye, “Winiplyame, winipsilyame,” nyabuka, Allah yupu kum petereptinge. Aning atonun winina ati ara, yupu sekeldongosunune. Na Paulus arye sekeipsene. Sal ap, kilapu ap, neiktoto, Allah yupu asik bulubikce talak

ara, kilapu erebikirye, sal deice tam atonun kibuka, Allah yupu peterena meme. Allah yupu peteren talak ara, sal aryuk peterebikibuk, kilapu ara, adip aryuk yupu nyana kum, tunimabuka kekebikirye kel biknamake.

¹³Ara, talye ati kume. Wininamak deiyok ara, nyapnukine. Ara, Allah arye Adam minop kwepdeibuk akarye, aminyan ara, Hawa kweipdeibuk.

¹⁴Tonda, Isa Mutuku Dongonye arye, tilila yupu nyabuk ura, Adam arye minop kum kekebuk. Hawa arye, atilila yupu minop kekebuka, malye winibuk ura, sik bitinye malye winina deiyok ning doproprikce, ulamrik. ¹⁵Diba, Hawa malye winibuk ura, Allah arye wenebuk bukni, Allah arye kilapu ati, lyelule. Kilapu sikda, Allah dib tenebikirye, yuk ninye ati bico tenebuka melina ap, talye ubuka una kum, kanye moubuka tenena ap, Allah diksukum ulye touk, fia diksukum una ap, ubikop ura, sik mapu delinamak talak nirya, ara, Allah arye kalekuka meliplirye lyelule. 'Ati sik kilapu aning bikikirye moubuka unamak' tenen, na Paulus arye sekeibkine.

Allah yupu peterena sik deiyok nang ap, Allah dib tenen nang, sik melibuka fil don nang ap ati, nyabuk yupu

3 ¹Anyapnukin yupu ara, fia dipkoprop yupu anya arye, ninye mutuku-mutuku nirya, adip aryuk ayupu dib teneptinge. Ara, yatanye do nirya, 'Se, Allah yupu peteren nang, sik kanye melibuka dina ati deiyoknye uptinye' tenen, kanye patalibuk ulinye bira, anye bira fia teleb mambul fil patalule. ²Ara, Allah yupu peteren nang. Sik deiyok talibuka fil dopmanto ninye adip aryuk wininyak ning lak nyapnukine. Sikda, malye winina fia kum winilamikibuk, yuk nang arye, "Anang wininyak ning ara, ani, ani," kum nyapmanto nang uk, wibuka delina telebe. Sikda, kilapu tonokuk dobuka unyakce, 'Talye kanye bobuka unune,' tenena kum aryuk, sik bidamnye ati bita dilakirye, teleb winina ap, ninye minop wana ap, yu pola una kumce, nimalye arye una ap, anirya wininamak nang ara, afil dopnamtinge. Ato nang ati ara, yuk ninye arye, "Anang ara, dipkoprop teleb wininyake," nyabuka, tenelamak nanguk afil dopnamtinge.

Tonda, yuk ninye do, ninye asik nang do, sik aik buplan kukulinyak nang wibuka delina telebe. Tonda, yuk nang bikna ati, teleb kibuka peterepting nang wilina telebe. Winilamice ninye uka. Yuk unyak ninye ara, wilina kume. ³Awipdeipnamlum nang, kum winipnamak ning ara, ani. Ara, kanye wangalamak mek, yu mek weik arye dina ap, yu ubuka ninye oldana ap, yupu deice arye waldana ap, 'Yo bok weik arye doproptinye' tenen, kanye engena ap, kum winiptinge. Nimalye arye teleb ubuka unanguk wibuka deipminbuk, afil doptinge.

⁴Allah yupu peteren nang, sik moubuka melina ati deiyok nang, adip aryuk wininamak ning ara, ani. Ara, sik mapu ap, sik kilapu ap, sik

winyak ning nirya ap, bita dilakirye, telebuk wininamake. Tonda, sik teleb ubuka winibikibuk, sik mapu koprop arye, sik ni yapu yupu moubuka kekenamak nang ara, sik ni yapu, afil moubuka doptinge. Sik mapu koprop arye, sik yupu min kum kekenamakop ura, ato nang wibuka deipminbuk, afil kum doptinge. ⁵Ara, talye ati kume. Yata nang do nirya, sik bidamnang mapu ap, sik bidamnang kilapu ap, sik bidamnang fil ap ati, dilakirye, teleb ubuka sirya dakna fil kum dobikke nang ara, yata wiribuka arye, Allah yupu peteren nang ap, Allah ati dib tenen ninye ap, sik deiyok nang kiptingce fil teleb ubuka dopting do? Aning kum winiptinge.

⁶Ara, Allah yupu peteren nang ap, Allah ati dib tenen ninye ap ati, deiyok kipmanto nang ara, winiryuk dib tenenyak nang ara, wibuka delina meme. Winiryuk dib tenepmak nang wibuka deipminyop ura, aminyan sikce, ‘E, nunda weik nang akunum unyabe’ tenen, dilakcop ura, Isa Mutuku Dongonye arye, ‘Na weik deiyoknye unamne’ tenen, malye ubuk ura, ‘Allah arye wenebuk touk, winibicak’ tenen, nyapne.

⁷Tonda, Allah dib tenena kum ninye arye, anang ati, “Sik malye winin ning ara, ani, ani,” nyabuka, ‘Lulupdakcak’ tenen, yuk talye nang arye, “Anang ara, fia telebuk unyake,” nyanyak nanguk afil doptinge. Yuk-yuk unyak ninye wibuka deipminyop ura, aminyan Isa Mutuku Dongonye arye, el wena fumbisik wekikibuk, yupnamle. Ara, sik malye ubikibuk, ‘Dauplye’ tenen, Allah yupu aik deiyok nang fil dopnin bakcebuk, aminyan yuk nang arye, sik anang babye, Allah dib tenen nang nirya babye ati, “Anang ara, malye uka,” ‘Nyapsikcak’ tenen, na Paulus arye sekeibkine.

Allah dib tenen ninye melin nang ati nyabuk yupu

⁸Ara, Allah dib tenen ninye ati, sik melibuka fil dopmanto nang yupu nyapnukine. Arup nyapmakin atonun, anang, yuk nang arye, ‘Anang ara, teleb un nang uka,’ tenebice nang uk, wibuka delina telebe. Tonda, aning ara, na tenen arye nyana kum, dipkoprop yupu nyana ap, yu mek kanye wangalamak mek weik arye kum dinyak nang ap, tonda, ‘Yo bok weik doproptibye’ tenen, malye winina ap, na tenena kum arye fil dona ap, kum wininyak nanguk, afil doptinge. ⁹Tonda, sik kanye tenen ning noutamak arye, ‘Na malye unye ning dauplye’ tenena kum arye, duknuna kum, diksukum ukirye, Allah ati dib tenebuka, fia moubuka donanguk afil doptinge. Dib tenebuka fia moubuka talinamak ning ara, minop talak Allah arye lak kibuka kum nyapdeiyamuk bukni, winitalak akunum lak arye peterelamsiake, fia noutamak ninguk talinamake. Na Paulus arye nyapne.

¹⁰Allah el mapu melina deiyok nang kina ati, anang wipdeipnamunye talak ara, minop yuk nang arye sik unyak ning ati, fia moubuka

dipdekibuk, malye winin ning kum wininyak nang ara, fia diksukum wininyak nang ara, anang dobuka erepdeiptume. Kumop ura, Allah mapu melina deiyok nang fil kum doptinge.

¹¹ Aning atonun, anang sik kilapu wininyak ning ati yupu ton nyapnune. Anang sik kilapu ati, yuk nang arye, “Akilapu ara, teleb winin kilapu uka,” nyalamak nang uk, afil dona ati erelina telebe. Sik kilapu arye, yuk ninye ati, yu uplibuk lulubuka minildana kum bukni, yata fil do, yata winin ning do nirya, talye kanye bobuka una kum arye, kanye moubuka tenebikirye, diksukumuk winin kilapu, sik akanye yapu erelina telebe.

¹² Allah el mapu melina deiyoknye bira, el kil tonokuk dobuka, unanye erelina telebe. Tonda anye birye el mapu ap, el kil ap, el winin ning nirya ap, el bidamnang bita dilirye, teleb ulamlinyebuk erelina telebe. ¹³ Afil akunum sirya daktongobuka dolamikce nang ara, yuk ninye arye sik ti, “Anang ara, fia telebe,” nyabuka, erebikirye wilinyake. Tonda, akunum lipsisikuka afil dobikce deice arye, kanye teniltona kum aryuk, Yesus Kristus ati, dib tenenyak ning ilil una kum aryuk, kanye lamabuka dib tenenyake.

¹⁴ Ara, na mi Timotiuso, ‘An dam minop yatinye’ tenen, patanili bukni, ‘Minpola yanamne do, siki yanamne do?’ tenen, winitalak asurat sekeibkine. ¹⁵ Aminyan arye yatinya babye, asurat deice arye, Allah el ti dib tenen ninye adip aryuk wininamak ning, ‘Teleb ning ara, ani,’ tenepnamlum tenena ati, ayupu sekeibkine. Allah dib tenebupu ura, kanye dukdongopsuk ninye nirya ara, Allah el mapu silip atonun unyabe. Ninye aik ayukumna yo ikuka dobice ura, adeice arye gat ding abuka tiklamle atonun, Allah Fia Kwemdinanye, el mapu arye el si erebuka, el dipkoprop yupu moubuka talibibirye kalikinyabe.

¹⁶ Anyapnukin yupu ara, ‘Tilila do, dib do?’ tenen, kum tenepmanto ning. Ara, Allah arye duknyamukbuk, ninye kum kel bikamik bukni, winitalak Allah arye anoutamak weik mambul yupu akunum laka kipdeipsuke. Ara, Allah diksukum ulye touk, nun babye, diksukum una ati, winipnamap deiyok ning ara, ani.

Allah ninye nong atonun dayukce ninye eipnamik ati, laka yayuke. Allah El Dib Kanye fil dobuka deice arye, ‘Yesus ara, el dipkoprop Allah El Mi Koprop’ tenen, dib tenebuka, ‘Kel biknamak’ tenen, laka kibuk.

Lak kibuk ura, Allah el im deice fil don nang, malaikat arye eibik. Ninye arye, Yesus el yupu dobuka, ninye mutuku-mutuku nirya ati, amutuku-amutuku nirya binuka peterelamik.

Peterelamikbuk, ninye mutuku-mutuku nirya unyak ninye weik arye kekebuka dib tenelamik.

Aminyan sirya talak ara, Allah arye Yesus ati, fia teleb kipdeibukce, erebuka im deice bobiyuk ura, im deice tam ulule.

**Allah yupu yaniplobuka tenepce arye, tilila
yupu nyan nang ati, nyabuk yupu**

4 ¹Allah El Dib Kanye arye, akunum min ning lak nyapsuk yupu ara, ani. “Sirya daknamle talak ara, ton nang ara, Allah el dipkoprop yupu yanibikirye, talya ati tilila yupu nyan isa arye peterenyak ning kekebuka, dobolbikirye, isa tam kiproprnamake.” ²Atilila yupu peteren ning ara, fia malye yupu, nyanyak nang peterenyaka deice arye yangasulule. Anang ara, ‘Tilila yupu nyanyaba,’ akunum tenenyak bukni, ‘Aning dauplye, tilila yupu auplibuk, talye kanye bobuka peterenamabe,’ tenenyake. Anang sik kanye tenen ning ara, yan diplamsil atonun ulule. Minop talak, teled ubuka tenelamik bukni, malye weik winilamik deice arye, winitalak ara, merekuka kum kel biktingce, moubuka kum kel bikinyake. Ati winitalak ara, sik kanye tenena deice arye, ‘Malye ning ani, teled ning ani’ tenen, moubuka kum biknamake.

³Sikke peterenyak yupu ara, ani. “Ninye kil dona malye, adip aryuk kil dona kum nang ara, kam uk kil dona kum unamlulume. Din ning dina ati ara, ton din ning yala adip aryuk kum dinamlume, ton din ning yala dinamlume,” nyabuka, peterenyake. Nyanyak bukni, Allah ati dib tenebuka, el dipkoprop teled yupu akunum kel bikinyak ninye ara, Allah arye aninye ati, ‘Din ning yala-yala nirya ara, telebe nyabuka, doprobikirye talye mangkau arye dinamak’ tenen, aning-aning nirya kwepdeipsuke.

⁴Ara, Allah arye kwepdeiamuk ning nirya, yata yala ning do nirya, Allah tenebibirye, aning ati, “Telebe,” nyabuka, kanye deibuka dopropbibyop ura, teleduk ulule. Aning nirya tonok ning babye, ‘Malye do?’ tenen, batakna kume. ⁵Din ning do, yata yala ning do nirya, batakna kum, talye mangkau kanye deibuka doproptibya deiyok ara, bitinye. Tonok ning ara, Allah arye, “Aning-aning kwepdeipse ning nirya teled ulule,” nyapsuke. Bitinye ning ara, nunce aning ati, “Nun Ni Allah, Telebe,” nyabuka Allah ati moronyap deice arye teled kililule. Ati din ning yala-yala nirya ara, telye diptibye.

⁶Timotiuso, winiryuk nyapmakin ning nirya dobuka, yuk nang dib tenen ninye ati, peterepminyop ura, adeice arye Yesus Kristus, el teled fil melinanye una ati, teled unamlame. Winipminyop ura, Allah el yupu dib tenenyap ning ap, sikce teled ubuka peterepkikbuk, kel biklumce moubuka talilyam ning ap, anoutam arye nebuka kanye wisinamkile. ⁷Allah arye kum nyapdeiamuk bukni, sik yuk nang arye talye nukunyak yupu ap, nong kum upnamle yupu, talye-talye peterelamak yupu ap ara, kekebuka dib tenena meme. Ayupu kekena fia kume. Aning kum bukni, ‘Allah el diksukumuk ulye touk, na babye winiptinye’ tenen, ance moubuka dilamince, kel biknamlyame.

⁸“Wininalyame,” nyapmakina deiyok ara, ani. Ara, nun nong mikip kilana ati, bik-bik ana ap, mikip arye fil dona ap ara, mitik teleb bukni, Allah fia diksukumuk ulye touk, nun babye teleb koprop una ati, adip aryuk kel bikna ara, weik mambul. Diksukum ubya deice arye, yuk winin ning nirya noutam melisulule. Nun kele, diksukumuk ubibyop ura, winitalak tukwak unyap talak babye, aminyan im deice binuka unamap talak babye, melibuka teleb keipdeipnamsile. Weik mambul ning ara, ‘Allah diksukum ulul touk, na babye diksukumuk unamne’ tenen unamabe.

⁹Anyapnusin yupu ara, fia dipkoprop yupu anya arye, ninye mutuku-mutuku nirya dib teneptinge. ¹⁰Allah ara, fia Kam Una Deiyoknye ulirye, ‘Ninye mutuku-mutuku nirya lyeptinye’ tenen, patalula ati ara, ninye arye dib tenebice ura, dipkoprop lyesulule. Ninye Lyena Deiyoknye ulula ati ara, el deice uk nun kanye delinyabe. ‘El uk melinamsil’ tenen, dina uk unyabe. Winilye ara, fia dib tenenyap ati ara, fia pi dobuka, mikip arye el fil uk donyabe.

¹¹Na nyapkin yupu dobuka, ance yuk ninye ati, “Anggun adip aryuk wininamlulume,” nyabuka, mikip arye peterenalyame. ¹²Ani, yuk nang arye an ti, “Anda kamnye atonun ulyama ati ara, an yupu kum kekepnukiyap ati, dauplye,” nyapkicop ura, sik anang ati yupu sekenamlyame. ‘Dauplye,’ tenena kume. Aning kum bukni, an winilaminye ning, yuk nang eipkikirye, ‘Kel biknamak’ tenen, winipmantonye bira anak unamlame. Ara, an yupu nyana ap, an winin ning nirya ap, yuk nang ati bico tenebuka melina ap, Allah ap, el yupu ap, diba tenelulum ning ap, mingne ubuka, diksukum una ap, winipminye deice arye yuk nang kel biknamkiake.

¹³An dam min kum yanamnye talak noutam nirya, batakna kum arye, fia tuba-tuba anyapnukin fil ara, donalyame. Ara, ‘Yuk ninye kekenamak’ tenen, laka ninye kekenak arye, Allah yupu yininamlyame. Tonda, Allah el yupu deice arye laka nyana ap, “Winiplulume,” nyabuka, peterena ap, “Winina meme,” nyabuka, wenena ap, fia wininamlyame. ¹⁴Minop talak afil min kum dolamlum talak ara, Allah yupu aik deiyok nang arye, sik taruk an nong deice deibuka, “Allah el fil moubuka winipman kum fil winibuka, winibuka donamle,” nyalilamkika deice arye, Allah El Dib Kanye arye fil bita dona deiyok ning aripkuk. Aripkuk ning ara, ‘Dauplye’ tenen, batakna meme. Anyuk tenebuka pi dobuka mikip arye fil donalyame.

¹⁵Anyapmakin yupu nirya ara, batakna kum arye fia pi dobuka, fil donalyame. An kanye ap, nong ap, mikip ap nirya arye, fia piribuka dopminyop ura, yuk ninye eibikirye, ‘E afil donmala ara, teleb winipnin banmala atia,’ tenenamake. ¹⁶An winin ning nirya ap, an peterminye ning nirya ap, ‘Malye nyapnikcak’ tenen, fia moubuka dildanamlyame.

Ara, ‘Na babye, na peterenye yupu kekenyak ninye babye, Allah arye lyepnamsil’ tenen, an adip aryuk batakna kum arye, tuba-tuba wininamyame. Winipminyop ura, Allah arye an ap, an peterepnalam ninye ap, lyepnamsile. Na Paulus arye nyabuka sekeibkine.

Wisi nang ap, wisi kilapu ap, youwak kilapu ap ati, nyabuk yupu

5 ¹Ara, yuk yupu ton nyapnukine. Wisi nang ati ara, mikip arye wenena ap, derelana ap, meme. Aning kum bukni, ‘Anang ara, na ni yapu atonun unyak,’ tenebuka, nimalye arye, “Naio, winina telebe,” nyabuka, peterenalyame. ²Yuk kam nang atonun unyak ninye ara, ‘Na weit yapu atonun,’ tenebuka unamlyame. ‘Wisi kilapu ara, na nin yapu atonun,’ tenebuka, namin arye unamlyame. Yuk kam kilapu ati ara, malye tenena ap, malye winina ap, fia kum arye, ‘Na weit kilapu atonun unyake,’ tenepmince, telebuk wininamyame.

³Sik dipkoprop youwak kilapu unyabuk, yuk nang nirya akunum batakamikibuk, sik yuk unyak youwak kilapu ara, kibuka melinalyame. Timotius, ance yuk ninye nirya ati, ayupu peterenalyame. ⁴Wininalam bukni, dan youwak kilapu do nirya, sik mapu ap, sik mapu arye deiamikce mapu ap, tuba ulamicop ura, talye parabuka melina kume. Ayouwak kilapu, sik mapu nebikcop ura, sik adip aryuk sik babye, sik nin yapu koprop ati, melinamake. Ara, minop kel bikting ning ara, ‘Allah dib tenenyaba ati ara, talye kum nyaplopnyabe’ tenen, kel biknamake.

Allah diba tenen ninye arye, sik tam ninye nirya ati, melilamak atonun, ‘Nun babye wininamap’ tenen, kel biknamake. Winipnamaka deice arye, anggun ni yapu ap, anggun nin yapu ap arye, sik mitik talak, bico tenebuka melilamsik atonun, anang pununa ati, kam nang arye sik nin yapu ap, sik ni yapu ati adip aryuk melinamake. Tonda, winipnamake nyabuka, Allah arye fia kanye deilinamsile.

⁵Yata youwak kilapu do nirya, el melin nang ap, el mapu ap, dipkoprop kum unyabuk, aning-aning pataplyop ura, utenelule. ‘Kume, Allah el uk melinamsil’ tenen, dib tenebikirye, kiting noutam babye, lukunyan babye, “Na Ni Allah melipnilyame,” nyabuka, Allah fia moronyake. Kum batakanyake.

⁶Bukni, yata youwak kilapu do nirya, ‘Kume, na kanye deibuka unye ning ap, aning-aning weik dopropnune,’ teneplirye, dilana ap, ulul kil ara, kam tuba ulul bukni, akunum dibinyak ninye atonun ulule.

⁷Aning ati ara, yata nang do nirya, ‘Mankau kanye bobuka malye winibikcak’ tenen, anyapnukin yupu bobuka ninye nirya ati peterenalyame. Ara, ani. ⁸Yatanye do nirya, weik ilil ning ara, el li koprop ap, el lin koprop ap, el kil ap, el mapu koprop ap, ura, sik uk kum bukni, el yala nang ap, el aik neika ulamak nang ap, aninye nirya sik pataplye ning ati, bico tenebuka kum meliptye ura, fia malye. Winiluluma

ara, Allah yupu yaniltana ap, Yesus batakna ap, atonun ulule. Yesus dib kum tenenyak ninye ara, mitik malye wininyak bukni, atonye bira, fia weik malye ulule.

“Youwak kilapu melina ati, sik si ara, Allah yupu aik ninye si sekna buku noutam sekuka deipnamlulume,” nyabuk yupu

⁹Ara, Allah yupu asik buku noutamak youwak kilapu melinamluma ati, si sekna ati ara, anyapnukin ning wininyak kilapu, sik uk si sekna telebe. Sik wisi danana ara, kiting tamun yupa weik 60 tahun atonun akunum uplye kilapu. Tonda, sik akanye yapu tuba kam ulamik talak, batakuka yuk nang kum dolamak kilapu sik si uk sekna telebe.

¹⁰Tonda, yuk ninye nirya arye, ayouwak kilapu sik winilamik ning akunum eibuka kel bikamik akarye, “Akilapu ara, fia telebuk wininyake,” nyabuka nyalamak kilapu ara, sik si uk sekna telebe. Ayupu ara, ani. “Kume, ayouwak kilapu, sik teleb winin ning weik aulule. Sik damang mapu ara, teleb kibuka kwaknalamikbuk, weik arye nelamik. Ninye asik nang ati, ‘Nun aik una telebe,’ nyabuka, buplan kukulilamik akarye, melilamik.” Ayupu atonun yupu nyapting kilapu ara, sik si sekuka milina telebe.

Tonda, yuk ninye melina ati, ‘Afil ara, malye fil ati ara, nun teleb kilapu arye kum fil dopnuyabe’ tenena kumce, yuk dib tenen ninye ati melilamik. Tonda, kanye imun ulamuk ninye melilamik. Ara, yata teleb winin ning do nirya, yuk ning tenena kum, afil uk dobuka teleb ulamik. Yuk ninye arye, ayouwak kilapu ati ayupu atonun nyaptingop ura, ‘Ato youwak kilapu ara, melinamabe’ tenen, si sekna telebe.

¹¹Bukni, youwak kilapubuk, fia wisi kum danamikce kilapu ara, sik si buku noutamak sekna meme. Deiyok ara, ani. Si sekne talak ara, sikce, “Kume, nunce Allah el fil dobuka unamap,” nyabuka, talye nyabuka duknubikirye, daulamica ani, aminyan talak, sik nong pataplye ning ati, ‘Se, afil batakuka, ninye tuba tamubuka tonap, doptibye’ tenen, pataplye ura, batakikirye, ninye ton tamubuka donyake. Ati sik si sekna kume.

¹²Winilamak deice arye, sik minop, “Wininamabe,” nyabuka, Allah ati nyalilamik ning batakikirye, Allah ati malye wininyak bukni, Allah arye akilapu wenepnamsile. Ati, youwak kilapu melina buku noutamak ara, kam kilapu sik si sekna meme.

¹³Aning uk kum bukni, ton malye wininyaka ara, nyapnukine. Ayouwak kilapu kam ulamice kilapu ara, dipkoprop fil dona kum, talye-talye unyakce, yuk ninye aik talye wekelbanyake. Sikda, talye nong ati kwalibikirye, yuk ninye wininyak ning fia eibikirye, yuk aik ninye ati, talye laka nyalbanyake. Ayupu nyanyak talak noutamak arye sik teleb ninye kum nyapmanto yupu, akilapu arye kanye lulubuka malye-malye yupu nyanyake.

¹⁴Anyapmakin touk wininyaka anya arye, anirya ati ara, na kanye ara, youwak kilapubuk, wise kum deiamikirye kam kilapu atonun ninye ati, nyabuka peterenune. Sik adip aryuk ninye dobikirye, mapu deibuka, sik wininyak ning nirya ati, bita dilakirye teleb ubuka unamake. Winibikcop ura, yuk ninye, Allah dib kum tenenyak ninye arye sik ti, “Akilapu sik malye winin ning ara, ani,” nyabuka, lulupsitinge. Deiyok ton kum atia. Malye kum winipmabibuk deiyok ton kum upnamla ati ayupu kum nyaptinge. ¹⁵Anyapmakina ara, talye ati kume. Yuk youwak kilapu arye, Yesus Kristus bisik akunum batakuka, Isa Mutuku Dongonye el bisik uk akunum banyaka ati nyapkine.

¹⁶Ara, yata dib tenen kilapu do nirya, anggun yala kilapu youwak akunum ubikcop ura, sik adip aryuk ayowak kilapu ati melinamake. Ara, yata mutuku do nirya, Allah dib tenen ninye arye, ayowak kilapu nirya ati, ‘Se, yata wiribuka melipnamap do?’ tenen, ‘Tkin kanye bobicak’ tenen, nyapne. Ati youwak kilapu kum bukni, Allah dib tenenyak ninye, mutuku-mutuku nirya arye, dipkoprop ikin kanye bobuka unyak youwak kilapu, sik yala nang kum unyabuk, ‘Aning-aning fia kum uplyop ura, pataplye kilapu melinamak’ tenen, nyapkine. Na Paulus arye nyabuka sekeibkine.

¹⁷Winira, yuk yupu ton nyapnukine. Allah yupu peteren nang, sik deiyok nang nirye arye, anang ati kibuka si erenamake. Allah yupu aik deiyok nang nirya ati, si erenamak bukni, weik mambul ning ara, Allah yupu fia bita lilibuka peterena ap, ‘Yuk ninye dib tenepnamak’ tenen, tilila nyana ap wininyakce, fil donyak nang ati ara, weik arye si erenamylulume nyapkine. ¹⁸Weik arye si erebuka anang erelinamlyame nyapmakina deiyok ara, ani. Allah yupu deice sekeiyamsik yupu ani.

‘Beras atonun ning lana ati, sapi basam arye beras deice yanibuka balamle talak ara, ‘El ton bulubuka diplyak’ tenen, el si bam bol tapu koulongona kume. El babye, ton bulubuka dina telebe.’

(Ulangan 25:4)

Tonda aning atonun.

‘Yata fil don nang do nirya, fil do bicop ura, sik fil domikca deice arye dekna ning, adip aryuk arinamlulume.’ *(Lukas 10:7)*

Ayupu nirya ara, aubuka ati ara, anggunce anggun ning bokuka, sik peterena deiyok nang ap, sik Allah yupu aik deiyok nang ati, melibuka arinamlulume.

¹⁹Ara, yuk nang arye, “Kume, Allah yupu aik deiyoknye, el malye winilul ning ara, ani,” nyabuka, el nong deice ikin ning deibikcop ura, talye kanye bobuka kekena kume. Kekena kum bukni, el malye winilye ning, yuk nang ton bitinye do, winilye do? Sik babye, ton eibikirye, neiktoto atonun nyaptingto ura, adeice aryuk kekenamlulume. ²⁰Allah dib tenen ninye, sik deiyok nang kan-kan arye, dipkoprop tuba malye

winibikcop ura, anang ati yuk ninye nirya lak kekenmacak arye, malinye nyanamlulume. Wininamluma deiyok ara, sik yuk deiyok nang kekebikirye, ‘Se, nun babye, talye arye malye winibibyak’ tenen, ‘Moubuka dilanamabe, tenepnamak’ tenen, wininamlulume.

²¹Ura, Timotiuso, na winiryuk nyapmakin ning nirya ara, fia moubuka talipminyak arye, peterenalyame. Allah ap, Yesus Kristus ap, Allah arye el im deice fil melin nang, wipdeibuk nang malaikat ap, sik nirya arye fia kekebuka disinyaka ati ara, na nyapkin yupu moubuka talinalyame. Tonda, ‘Anang ara, na kwityapu nang ati ara, kum wenepnune, dauplye,’ tenepminyak arye, yuk onang ati, ‘Mikip arye nyanamne,’ tenena kum aniryuk, yata ninye do nirya ati, atonun tenebuka, kanye wililana kum arye, teleb kibuka peterepra unamlame. Na Paulus arye nyapkine.

²²Tonda, ‘Aninye ara, Allah el fil uk donamak’ tenen, ‘Sik nong deice na taruk deibuka, Allah moropnirye dopkwetepnamne’ tenen, minopce kum winipnalyame. Ara, talye ati kume. Deiyok ara, anang arye malye winibikce babye, moubuka tenena kum arye, minopce an taruk sik nong deice deibuka, Allah moropminyak arye, minopce dopkwetepminya deice arye, an babye, malye upminyak tenen ati, nyapkine. Yuk nang malye winin ning ara, an ap, neiktoto malye winina kume. Anda malye winina fia kum dib aryuk, diksukumuk unamlyame. ²³Timotiuso, atalak ton, atalak ton, an munuk weik arye dikulula ati, tonda, an munuk dilamkilya kum danana ati ara, talye mek uk dilyama ara, kume. Anuk ap, mun ap, teleb kipdeipnamkil ning ati, kanye wangalamak mek, anggur mek mitikanun dina telebe nyapkine.

²⁴Ara, Allah arye do, ninye deiyok nang arye do, yupu bokuka wenena talak ati, ton ning ara, ninye wenena deiyok nang dam min kum bobinabikce talak ara, lak arye fia malye winibikce ura, yuk ninye eibikirye talye lak nyabikibuk, nirya kekebuka kel kibikirye, sik malye winin nang aminyan yanganyake. Ton ning ara, teleb winin nang atonun ubuka, talye kanye bobuka ninye wenen ak yaki bukni, yupu talibikce talak aryuk, sik malye ulamice ning laka kililule. ²⁵Aning atonun, ninye arye teleb winilamak ning babye, atonun lak upnamle. Ton nang ara, sik teleb winin ning lak ubikce ura, yuk ninye nirya eibikirye kel bikinyake. Ton nang ara, teleb wininyak bukni, yuk ninye arye atalak aryuk kum elikirye, kel kum bikinyake. Bukni, aning babye, aminyan talak kum duknupmanto ning ati ara, lak kipnamlarya.

“Anggun nirya arye, anggun deiyok nang ati, si erebuka, telebuk wininamlulume,” nyabuk yupu

6 ¹Tilila aryuk talye fil don nang malye ubice ura, yuk ninye eibikirye, ‘Allah el si ap, nun peterenyap yupu, Allah yupu ati, malye yupu nyabuka lulupsikcak’ tenen, yata fil don nang do nirya, sik

deiyok nang arye yo bok deice dekik^e ura, tilila aryuk talye fil donyak nang nirya arye, sik fil deiyok nang ati, talye nyaltakana kum bukni, si erebuka teleb wininamake. ²Aning atonun, sik tilila aryuk talye fil donyak ninye bukni, sik deiyok nang, Allah dib tenebik nang wininyakop ura, sik amutam fil dobuka unyak nang arye, ‘E, nun deiyok nang ara, Allah dib tenen nang anya arye, nun mitik nang atonun unyaba ati, mitikanun arye si erebuka unamabe,’ tenena kume. Aning ara, fia kum bukni, afil don nang arye, sik deiyok nang dib tenebik nang ati ara, mitikanun arye kume. Fia teleb ubuka sik fil melibuka donamake.

Deiyok ara, sik fil dopbice ura, teleb winibikirye doproprnamak nang ara, Allah dib tenen nang unyaka ati, weik arye si erebuka unamake. Tonda, amutam ubuka fil donyak nang arye, sik deiyok nang ati, anggun adip aryuk bico tenenamak ati nyapkine. Ati, asukum deice tam nyapmakin yupu ara, urdem aryuk fil dopra unyak nang ati, mikip arye peterenalyame.

**“Na kayapu, ‘Yo bok weik doproptibye’ tenen,
deice arye malye unyake,” nyabuk yupu**

³⁻⁴Yatanye do nirya, tilila yupu petereplirye, nun Deiyouknye Yesus Kristus arye peterelamsuk yupu ap, Allah arye, ‘Wininamake,’ tenepsuk touk, peteren yupu ap, dib tenen kum arye, batakuka yaniltakalinye bira, makna kintinipdakirye, ‘Na ara weiknye,’ tenelul bukni, dipkoprop ara, fia walwalnye ulule. Aning-aning nirya moubuka kum tenelule. Atonye bira, ninye arye yupu deice waldanyak yupu ap, moubuka kum laka nyapmanto yupu bukni, “Ayupu deiyok ani, ani,” nyabuka, yu uplye ati, kanye yuk-yuk wilildanyak yupu ap, ati, fia patalule. Amalye yupu deice arye, ninye talima wililanyak akarye, tonye birye, yuknye biti, ‘Se, anye birye malye upnamnil do?’ tenen, ilil teneldanyake. Atonye bira, amalye yupu ati, kanye deililula ati ara, elda uk dinanye atonun ulule. Na Paulus arye nyapkine.

⁵Wininyak deice arye, kanye deibuka teleb ubuka neiktoto una fia kum arye, malye teneldana ap, waldana ap, oldana ap, wininyake. Awininyak ninye ara, sik kanye talima fia malye ubuka anya arye, dipkoprop moubuka kum teneptinge. Allah el dipkoprop yupu batakuka yaninyaka ati ara, winitalak ara, teleb ning kum teneptinge. Deiyok ara, sikce. Tonda, anang sik malye tenenyaka ara, ‘Allah yupu dobuka yuk nang ati peterebipyop ura, aminyan ara, yuk nang arye yo bok aripsikce deice arye bona weik talin nang mapu unamabe,’ tenenyake.

^e 6:1 *yo bok deice dekik* – Yo bok deice deklamik ninye ara, bona weik talin nang arye, bona utotoa talina kum ninye ati, yo bok deice arye deklamik. Deklamikba, abona talina kum ninye arye sik bona weik talininye ati sik fil talya urdemuk dolamik. Tonda, lak len yupu ara nomor 36 dipdelulume.

⁶Sikda, winibuka tenenyak bukni, dipkoprop ning ara, ani. Ara, ‘Allah diksukum ulye touk wininamne,’ tenebuka, ‘Na dam aupmanil ning akunuma,’ tenena ap, tonda, ‘Kanye deibuka telebuk unamne,’ tenena ap ara, fia telebe. Winina ara, fia teleb winilnamsile. ⁷Anyapmakin yupu deiyok ara, nun ni yapu arye deipsik talak ara, aning-aning bobuka kum yanamupe. Talye nong yoka dem deipsike. Tonda, daulamibya ani, dibibye talak ara, tonok ning babye, kum dobuka bobitibye. Talye nong banang demuk binamabe.

⁸Bukni, nun dina patapsilye ning ap, ongon butum aling ap, awabsilyop ura, awabsilya deice arye talye kanye bobuka, telebuk unamabe. ‘Se, aning ton, aning ton doproptinyak arye, adip aryuk winiptinye,’ tenena kume, telebuk kanye bobuka, ‘Na wapnil ning ara, akunum’ tenen, kanye lamabuka una telebe. ⁹Bukni, ‘Se, nunda bona weik talin nang mapu uptibye’ tenen, fia pataplye ninye ara, atenen deice arye, Isa Mutuku Dongonye arye, ‘Sik malye upting’ tenen, sik kanye talima lilolibuk, malye un ning patalulbuk, malye weik wininyake. Tonda, nong kum upnamle ning bukni, talye-talye ning patana weik ap, malye usilye ning patana ap, akunum winiplibuk, malye weik wininyake. Wininyakop ura, winipmanto ara, anoutamak arye, ikne fumbisik kabang balyebuk youlamle atonun, weik ikin ning fia malye ulisulule. Aning ara, kum lipsisikmanto.

¹⁰Anyapmakin yupu ara, talye ati kume. El deiyok ara, yata ninye do nirya, ‘Se, bona weik talinanye utibye’ tenen, yo bok do, dengna weik ning do, weik arye patalyop ura, adeice arye malye winin ning yala weik wininamake. Anyapmakin touk, ton nang ara, ‘Yo bok weik doproptibye’ tenen, patabuk deice arye, Allah dib tenelamak ning batakuka, talye yuk bisik balamakbuk, aminyan ara, weik kanye imun ning ap, ikin ning weik ap, kanye bokoltona ap, weik ulule. Sik ikin ulilalamik. Na Paulus arye nyapmakine.

Paulus arye Timotius el ti nyabuk yupu

¹¹Aninye malye ulilalamik bukni, anda Allah el yupu nyasilye touk ubuka, el fil donanye ulyama ati, amalye winin ning nirya dam una meme. Bik-bik abuka yukak balamak atonun, amalye ning batakuka, ‘Fia telebuk winiptinye’ tenen, patapkilye ura, pi dobuka wininalyame. Ara, diksukum una ap, Allah diksukum ulye touk una ap, Allah dib tenena ap, yuk ninye ati bico tenebuka melina ap, ‘Ikin ning aupmanil’ tenena kum arye, batakna kum fia fil dona ap, yuk ninye ati, namin arye una ap, anirya ara, an adip aryuk fia piribuka wininalyame. ¹²Yin talin nang arye, ‘Yuk mutuku ninye obisipsikcak’ tenen, fia pi dobuka olalamak atonun, Allah dib tenebuka taliplum fil moubuka talina ati, mikip arye pirilenamlyame. Allah ati dib tenelulum ning ara, moubuka talipmince fia bobanamlyame. Aning ara, fia telebe.

Minop talak, ninye weik kekenmekba, ance, “Kristus ati, dib tenenune,” nyabuka, teleb yupu nyaplum talak ara, Allah arye, ‘Anye bira, na ap, im deice fia unaname’ tenen, wideipkuke. ‘Bol koplobuka fia kam una ati, kintinipkuk ning doproprnamne’ tenen, fia moubuka teneminyak arye dolonamlyame. ¹³Na mi Timotiuso, aning nirya, kam una deiyok ning arisilinye Allah ap, ura, Pontius Pilatus dam yupu boban talak arye, yupu teleb ubuka lak arye nyabuknye Yesus Kristus ap, sik bitinye kekebuka dinmasirak deice arye, amambul yupu nyapdeipnukine.

¹⁴Ara, asurat deice nyapmakin yupu nirya kekebuka talinalyame. Moubuka talinalam talak noutamak nirya ara, tonok ning babye, kum bataknamlyame. Tonda, anyapmakin touk, bita teleb fil donamlyamce sirya dakanamlyame. Winipminyop ura, yuk ninye arye, “E, el malye ulul ning ara, ani,” kum nyapmanto upnamake. Winibuka fia ulamlya ani, aminyan ara, nun Deiyoknye Yesus Kristus tamubuka yanamle.

¹⁵Yesus tukwak mutuku tamubuka yanamla ara, Allah arye el teneamuk touk, atalak akunum uplyop ura, yanamle. Nun Ni Allah ara, ikin ning tonok babye, ton, el deice fia kum ulula ati ara, fia telebuk ulule. El tonok aryuk aning-aning nirya, Weik Deiyoknye ulirye, aning nirya deice tam ulule. Yuk Weik ninye deiyok ninye, Sisin nang aunyak bukni, elda sik deice tam Weik Raja ulule. Ninye deiyok nang yala weik daunyak bukni, sikda el amutamuk unyake. Elda, sik deice tam uk ulule.

¹⁶El tonok ara, kum diptue, fia kam uk unamle. El ulya ara, ninye tukwak ninye kum binmanto ak, weik dirina noutam ulule. Yata mutuku ninye do nirya, el nong fia kum elilamik, tonda, fia kum eiptinge. Na Paulus arye nyapmakine. Na fia patanulul ning ara, ninye mutuku-mutuku nirya, el si uk fia erenamake. Tonda, el weik mikip arye aning-aning nirya ap, ninye nirya ap, talibuka unamle. ‘Aning ara, dipkoprop upnamle’ tenen, Amin nyapne. Na Paulus arye sekeibkine.

Surat sirya dakaldongona ati, nyabuk yupu

¹⁷Winitalak tukwak mutuku unyakce, aning-aning nirya weik talikirye bona weik talin nang atonun unyak ninye ati, nyanamlyame. “Anggunda makna kanye uk kintinina ap, dina ap, meme. Bona ap, yo bok ap, tukwak bona weik nang nirya ap ara, anang deice anggun kanye delina kume. Aning arye kum lyepsutue. Aning nirya ara, fia unamle ning kume. Yata wiribuka talak uk aupmalyani, aminyan talak tukukwak ning nirya kum danamle. Tukukwak ning ara, ‘Yata talak kum danamsil do?’ Nun walwal anya arye aning ati kanye delina meme. Aning kum bukni, ‘Allah elcuk melipsilirye lyepnamsil’ tenen, el deice uk anggun kanye delinamlulume. Nun kanye deibuka, teleb una ati, arisilya deiyoknye bira, Allah elcuk aning-aning nirya weik arye arisulule.” Ayupu nyapnamlyame.

¹⁸Tonda, bona weik talin nang ati ayupu ton nyanamlyame. “Sik bona weik talin nang ara, sik bona weik aulye touk, teleb un ning weik arye fia upmunyop ura, aning ara, bona weik talin nang atonun unamake. Tonda, ‘Se aning ara, ‘Na’ tenen ning anya arye, kum arinamne’ tenen, teniltona kum aryuk, talye kanye bobuka yuk ninye ati, anggun ning weik arye bokuka arinamlume,” nyabuka peterenamlyame. Na Paulus arye nyapmakine.

¹⁹Bona weik talin nang, sik ning bokuka, yuk ninye arilamakop ura, adeice arye, im deice dekna atonun ning weik aripnamle. Winipmanto ara, ayukumna teleb yo arye aik ayukumna ikikcop ura, fia gat ubuka mikip ulamle atonun, bona weik talin nang arye yuk nang ati, weik arye melibikcop ura, aminyan talak ara, Allah arye meliplibuk, sik babye teleb unamake. Anirya ara, talye ati kume. Deiyok ara, talye una kum bukni, ‘Fia dipkoprop bol koplobuka, kam fia un ning dopropnamak’ tenen, nyapne.

²⁰Timotiuso, fia mambul yupu nyapnukine. Allah arye aryamkuk ning ara, ‘El dipkoprop yupu ara, malye upnyak’ tenen, bita diminyak arye, fia moubuka talinamlyame. Yata talye yupu do nirya, nong kum upnamle yupu, Allah ati yanin yupu ap, Allah yupu nyasilye touk kum bukni, yuk tilila yupu, talye peteren yupu ap ara, ayupu nirya kekena fia meme. Donga ibuka yukak unamlyame.

Atalye yupu nirya ara, ton ninye arye, “Kume, ayupu ara, weik kel bikne yupu. Fia mambul yupu,” nyanyak bukni, dipkoprop ayupu ara, walwal yupu ati ara, talye tilila yupu nyanyake. ²¹Ton nang ara, ayupu kekebuka talyamik deice arye, Allah el dipkoprop yupu ap, el dipkoprop bisik ap, batakuka, yukak uk bindobike.

‘Allah arye an ti, el kanye aniryuk bico tenebuka melinakil’ tenen, Allah morokunune.

Telebe, na Paulus arye akunum nyabuka sekeibkine.

Asukum uk deipne.